

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", broj: 7/97. i 3/99.), na prijedlog Vlade Tuzlanskog kantona, Skupština Tuzlanskog kantona na sjednici od 30.4.1999. godine, d o n o s i

## **Z A K O N O OBRTU**

### **I. OPĆE ODREDBE**

#### **Član 1.**

Ovim Zakonom uređuju se uslovi i način obavljanja obrtničke djelatnosti (u daljem tekstu: obrt) na području Tuzlanskog kantona (u daljem tekstu: Kanton) izuzev djelatnosti, koje su uređene posebnim zakonom.

#### **Član 2.**

Obrt je samostalno i trajno obavljanje dopuštenih i registrovanih privrednih djelatnosti od strane obrtnika u svrhu postizanja dobiti koja se ostvaruje proizvodnjom, prometom ili pružanjem usluga na tržištu.

Obrti u smislu ovog Zakona su: slobodni, vezani, ovlašteni i obrti od posebnog značaja.

**Slobodni obrti** su oni za čije se obavljanje ne traži stručna osposobljenost ili majstorski ispit.

**Vezani obrti** su oni za čije se obavljanje traži stručna osposobljenost ili majstorski ispit.

**Ovlašteni obrti** su obrti koje obrtnik smije obavljati samo ako ispunjava uslove za vezane obrte iz stava 4. ovog člana i ima ovlaštenje koje izdaje nadležno ministarstvo ovisno o vrsti obrta.

**Obrti od posebnog značaja** su obrti koji trebaju da očuvaju tradicionalni i umjetnički obrt.

Popis vezanih obrta, obrta od posebnog značaja, stepen i vrstu stručne spreme potrebne za njihovo obavljanje te popis ovlaštenih obrta i način izdavanja ovlaštenja utvrđuje nadležno ministarstvo, ovisno o vrsti obrta, posebnim popisom.

#### **Član 3.**

Obrtnik je fizičko lice koje obavlja djelatnost u svoje ime i za svoj račun, a pri tome se može koristiti radom drugog lica.

Obrt obavlja i pravno lice koje ima registrovanu jednu ili više djelatnosti vezanog ili ovlaštenog obrta, ako to ne čini na industrijski način.

#### **Član 4.**

Ako obrtnik ostvaruje dohodak veći od 1.000.000 KM za prethodnu godinu dužan je kada se ispuni ovaj uslov zatražiti brisanje iz registra obrtnika i osnovati preduzeće.

Ako obrtnik ne postupi u skladu sa stavom 1. ovog člana, nadležni općinski organ uprave za poslove privrede (u daljem tekstu: nadležni općinski organ) donijet će rješenje o prestanku obavljanja obrta, u roku od 30 dana od dana podnošenja godišnjeg obračuna obrtnika.

Ministarstvo obnove, razvoja i poduzetništva (u daljem tekstu: Ministarstvo) će na početku svake godine zatražiti od porezne uprave podatke o obrtnicima koji su u prethodnoj godini ostvarili dohodak veći od 1.000.000 KM, o čemu će obavijestiti nadležni općinski organ.

### **II. USLOVI ZA OBAVLJANJE OBRTA**

#### **Član 5.**

Fizičko lice može obavljati obrt ako ispunjava slijedeće opće uslove:

- da je državljanin Bosne i Hercegovine, sa prebivalištem na teritoriji Bosne i Hercegovine,
- da je punoljetno i da nije djelimično ili potpuno lišeno poslovne sposobnosti,
- da zadovoljava općim i posebnim zdravstvenim uslovima, ako je to propisano zakonom,
- da mu pravosnažnom sudskom presudom odnosno rješenjem o prekršaju ili upravnim aktom nije zrečena mjera zabrane obavljanja obrta dok ta mjera traje,

## **"Službene novine Tuzlanskog kantona", broj: 04/04**

- da pruži dokaze da nema neizmirenih finansijskih poreznih i drugih finansijskih obaveza prema društvu. Obrtnik može početi sa radom pod uslovom da:
- ima rješenje o obrtu,
- ispunjava minimalno tehničke uslove za obavljanje tražene obrtničke djelatnosti,
- ima mišljenje Obrtničke komore.

### **Član 6.**

Strani državljanin može obavljati obrt:

- ako ispunjava opće uslove iz člana 5. stav 1. alineja 2, 3, 4, i 5. i člana 5. stava 2. ovog Zakona uz primjenu načela uzajamnosti;
- ako zaposli najmanje jedno lice državljanina Bosne i Hercegovine, u roku od 60 dana od dana početka obavljanja obrta .

### **Član 7.**

Fizičko lice može obavljati vezani obrt ako uz opće uslove ispunjava i poseban uslov stručne osposobljenosti ili položenog majstorskog ispita.

Fizičko lice koje ispunjava opće uslove a ne ispunjava poseban uslov stručne osposobljenosti ili majstorskog ispita može obavljati vezani obrt ako na tim poslovima zaposli lice koje udovoljava tom uslovu.

### **Član 8.**

Kada je za obavljanje obrta potreban prostor obrtnik može obavljati obrt samo u prostoru za koji ima dokaz o pravu vlasništva ili korištenja.

Prostor iz stava 1. ovog člana i oprema moraju zadovoljiti određenim propisima o tehničkoj opremljenosti, zaštiti na radu, zaštiti i unapređenju čovjekove okoline, te drugim propisima koji se odnose na obavljanje određene privredne djelatnosti, koje utvrđuje komisija sastavljena od članova nadležnog općinskog organa i predstavnika Obrtničke komore.

Komisiju iz prethodnog stava formira rješenjem nadležni općinski organ, kojim utvrđuje i naknadu za njen rad.

Obrt se može obavljati u stambenim prostorima pod uslovima i za djelatnosti koje će propisati nadležni ministar zavisno o vrsti obrta.

Vrste obrta, uslove i djelatnosti, koje se mogu obavljati izvan poslovnih i stambenih prostorija propisat će nadležno ministarstvo zavisno o vrsti obrta.

## **III. OTVARANJE OBRTA**

### **Član 9.**

Obrtnik podnosi zahtjev za izdavanje odobrenja za obavljanje obrta nadležnom općinskom organu.

Obrtnik može imati samo jedno rješenje o obrtu, a za svaki izdvojeni pogon rješenje o ispunjavanju minimalno tehničkih uslova.

### **Član 10.**

Za obavljanje obrta obrtnik mora imati rješenje o obrtu.

Rješenje o obrtu izdaje nadležni općinski organ.

Rješenje o obrtu pored sastavnih dijelova predviđenih zakonom o upravnom postupku sadrži:

- ime lica koje otvara obrt,
- lične podatke lica, sjedište,
- firmu, djelatnost i
- naziv obrta.

Za obavljanje ovlaštenih obrta obrtnik mora pored rješenja o obrtu imati i ovlaštenje koje izdaje nadležno ministarstvo zavisno o vrsti obrta.

## **"Službene novine Tuzlanskog kantona", broj: 04/04**

Sadržaj i oblik ovlaštenja utvrđuje nadležno ministarstvo zavisno o vrsti obrta.

### **Član 11.**

Registar obrtnika vodi nadležni općinski organ.  
Glavni registar obrta vodi Ministarstvo.  
Oblik i način vođenja registra obrtnika propisuje Vlada Kantona.

### **Član 12.**

Nadležni općinski organ na osnovu uredno podnesenog zahtjeva, izdat će rješenje o obrtu kojim se odobrava obavljanje obrtničke djelatnosti fizičkom licu koje ispunjava uslove ovog Zakona, u roku od 15 dana od dana podnošenja zahtjeva.

### **Član 13.**

Nadležni općinski organ izdat će rješenje kojim se odbija izdavanje rješenja o obrtu najkasnije u roku od 15 dana od dana uredno podnesenog zahtjeva, ako podnosilac zahtjeva ne ispunjava jedan ili više uslova iz ovog Zakona.

Ako nadležni općinski organ ne izda rješenje o obrtu u propisanim rokovima, obrtnik može ako smatra da ispunjava uslove propisane ovim Zakonom započeti sa obavljanjem obrta o čemu pismeno izvještava nadležni općinski organ.

Protiv rješenja nadležnog općinskog organa podnosilac zahtjeva ima pravo žalbe u roku od 15 dana od dana prijema rješenja komisiji za žalbe pri resornom ministarstvu zavisno o vrsti obrta.

Komisiju za žalbe iz prethodnog stava imenuje ministar, a sastoji se od predsjednika i 2 (dva) člana.

### **Član 14.**

Obrtnik je dužan otpočeti sa obavljanjem obrta u roku od 6 mjeseci od dana izdavanja rješenja o obrtu.

Obrtnik je dužan najkasnije 8 dana prije početka obavljanja obrta prijaviti obavljanje obrta nadležnom općinskom organu, koji će o tome odmah izvijestiti odgovarajuće inspekcije.

Ako obrtnik bez opravdanih razloga ne otpočne sa radom u roku iz stava 1. ovog člana, nadležni općinski organ izdat će rješenje kojim rješenje o obrtu prestaje da važi.

### **Član 15.**

Nadležni općinski organ dužan je sva rješenja u vezi sa obavljanjem obrta dostaviti obrtniku, Ministarstvu, nadležnom organu za poslove finansija, poreznoj upravi, nadležnim inspekcijama, nadležnim udruženjima obrtnika, nadležnom fondu penzijskog i zdravstvenog osiguranja i Federalnom zavodu za statistiku.

### **Član 16.**

Firma je ime pod kojim obrt posluje.

Firma sadrži naziv obrta, oznaku obrta, ime i prezime obrtnika i sjedište, a može sadržiti i posebne znake.

Firma ne može sadržati naziv i oznake koje su u suprotnosti sa domaćim propisima i međunarodnim konvencijama.

Obrtnik može promijeniti naziv i oznaku firme.

Promjenu naziva i oznake firme obrtnik prijavljuje nadležnom općinskom organu koji o tome donosi rješenje.

Firma se mora istaknuti na ulazu u sjedište obrta i izdvojene pogone u kojima se obavlja obrt ili na mjestu gdje se obrt obavlja ako se radi o obrtima za koje nije potreban prostor.

### **Član 17.**

Sjedište obrta je mjesto gdje se obavlja obrt .

Ako se obrt obavlja u više mjesta, sjedište obrta je u jednom od tih mjesta koje obrtnik odredi.

## **"Službene novine Tuzlanskog kantona", broj: 04/04**

Ako za obavljanje obrta nije potreban prostor, sjedište obrta je mjesto u kojem obrtnik ima prebivalište.

### **Član 18.**

Obrtnik može promijeniti sjedište obrta.

Promjenu sjedišta obrta, obrtnik prijavljuje nadležnom općinskom organu koji o tome donosi rješenje i izvještava Ministarstvo radi upisa promjene sjedišta obrta u obrtnom registru.

Obrtniku kome je rješenje o obavljanju obrta izdato od nadležnog organa drugog kantona, može prijaviti sjedište na području Kantona ukoliko podnese prijavu, priloži rješenje o obrtu i odjavu iz kantona u kojem je imao sjedište.

## **IV. POSLOVANJE OBRTA**

### **Član 19.**

Obrtnik može obavljati one obrte koji su obuhvaćeni rješenjem o obrtu.

Rješenje o obrtu ne može se prenijeti na drugo lice osim u slučajevima kada je ovim Zakonom drugačije određeno.

Osim obrta iz stava 1. ovog člana obrtnik može obavljati i druge djelatnosti koje služe za obavljanje djelatnosti koje su obuhvaćene rješenjem o obrtu ili se uobičajeno obavljaju uz djelatnost obuhvaćenu rješenjem o obrtu, ako se obavljaju u manjem obimu.

### **Član 20.**

Za obaveze koje nastanu u obavljanju obrta, obrtnik odgovara cjelokupnom imovinom.

Obrtnik odgovara za zakonitost obavljanja obrta i za zakonitost rada radnika koje zapošljava.

### **Član 21.**

Obrt se može obavljati u više izdvojenih pogona koji moraju udovoljavati uslovima iz člana 8. ovog Zakona. Pod izdvojenim pogonom u smislu ovog Zakona podrazumijeva se jedan ili više međusobno odvojenih prostora u kojima se obavlja obrt, a nalazi se izvan sjedišta obrta.

### **Član 22.**

U svakom izdvojenom pogonu obrtnik koji obavlja slobodni obrt dužan je imenovati poslovođu koji mora biti u radnom odnosu kod obrtnika.

Obrtnici koji obavljaju vezane ili ovlaštene obrte dužni su u svakom izdvojenom pogonu imenovati stručnog poslovođu koji mora biti u radnom odnosu kod obrtnika i ispunjavati posebne uslove stručne osposobljenosti ili položenog majstorskog ispita.

### **Član 23.**

Obavljanje obrta u izdvojenom pogonu, odnosno prestanak obavljanja obrta u izdvojenom pogonu obrtnik prijavljuje nadležnom općinskom organu.

Nadležni općinski organ izdat će rješenje o obavljanju obrta, odnosno o prestanku obavljanja obrta u izdvojenom pogonu.

O obavljanju obrta u izdvojenom pogonu, odnosno prestanku obavljanja obrta nadležni općinski organ izvestit će Ministarstvo, koje će to upisati u obrtni registar.

### **Član 24.**

Vođenje slobodnog obrta putem poslovođe u izdvojenom pogonu obrtnik prijavljuje nadležnom općinskom organu, koji rješenjem utvrđuje vođenje obrta putem poslovođe u izdvojenom pogonu i to se upisuje u obrtni registar.

**Član 25.**

Nakon smrti obrtnika rješenje o obrtu se može prenijeti na njegove nasljednike.

Ako nasljednik nema propisanu stručnu spremu za obavljanje obrta ili ako su djeca maloljetna, obrt se nastavlja putem privremenog poslovođe, koji mora ispunjavati opće i posebne uslove ovog Zakona.

Nasljednik je dužan u roku od 30 dana od dana smrti obrtnika imenovati privremenog poslovođu.

Privremeni poslovođa se upisuje u registar obrtnika.

Privremeni poslovođa je dužan voditi obrt pažnjom dobrog privrednika za račun nasljednika umrlog obrtnika.

**Član 26.**

Ako nasljednici žele prenijeti rješenje o obrtu nakon smrti obrtnika na sebe te nastaviti voditi obrt putem poslovođe, dužni su o tome podnijeti zahtjev nadležnom općinskom organu u roku od 30 dana od dana okončanja ostavinskog postupka.

Uz zahtjev iz stava 1. ovog člana nasljednici moraju priložiti:

- izvod iz knjige umrlih za obrtnika,
- pravosnažnu sudsku odluku o nasljedjivanju,
- ime i prezime poslovođe i dokaz o stručnoj spreml,
- izjavu nasljednika o saglasnosti vođenja obrta putem poslovođe.

Nadležni općinski organ donosi rješenje te izvještava Ministarstvo radi upisa prijenosa rješenja o obrtu i nastavak vođenja obrta putem poslovođe u obrtni registar.

**Član 27.**

U slučaju djelimičnog ili potpunog gubitka poslovne sposobnosti obrtnika, koja se utvrđuje odlukom nadležnog suda bračni drug ili djeca mogu prenijeti rješenje o obrtu na sebe, te nastaviti obavljati obrt putem poslovođe.

Lica iz prethodnog stava dužna su o tome podnijeti zahtjev nadležnom općinskom organu, u roku od 15 dana od dana pravosnažnosti odluke o lišavanju poslovne sposobnosti.

Uz zahtjev mora se priložiti:

- pravosnažna sudska odluka o lišenju poslovne sposobnosti obrtnika,
- ime i prezime poslovođe i dokaz o stručnoj spreml.

Nadležni općinski organ donosi rješenje te izvještava Ministarstvo radi upisa rješenja o obrtu i nastavak vođenja obrta putem poslovođe u obrtni registar.

**Član 28.**

Ako nasljednici umrlog obrtnika, bračni drug ili djeca obrtnika propuste rok iz člana 26. ovog Zakona gube pravo na prenošenje rješenja o obrtu i nastavak vođenja obrta, a obrt prestaje po sili zakona.

**Član 29.**

Obrtnik može privremeno obustaviti obavljanje obrta u trajanju do jedne godine dana u slučaju bolesti, vršenja vojne obaveze i drugim opravdanim slučajevima, o čemu pismeno izvještava nadležni općinski organ u roku od 15 dana od dana obustave obavljanja obrta.

Rješenje o privremenoj obustavi obavljanja obrta, razlozima obustavljanja obrta i trajanja privremene obustave donosi nadležni općinski organ u roku od 8 dana od dana prijema zahtjeva.

O ponovnom početku obavljanja obrta obrtnik je dužan pismeno izvijestiti nadležni općinski organ najkasnije u roku od 8 dana po isteku vremena privremene obustave obavljanja obrta.

Nadležni općinski organ u roku od 8 dana od dana prijema zahtjeva izdat će rješenje o nastavljaju obavljanja obrta.

**Član 30.**

Obrtnik u obavljanju djelatnosti mora na način dostupan potrošačima:

- istaknuti cijenu svojih proizvoda odnosno usluga,
- proizvode obezbijediti proizvodjačkom deklaracijom,
- za složene proizvode obezbijediti garantni list, tehničko uputstvo i rezervne dijelove,
- istaći radno vrijeme i pridržavati se istog.

**V. ZAJEDNIČKO OBAVLJANJE OBRTA**

**Član 31.**

Dva ili više lica mogu zajednički obavljati obrt.

Međusobni odnosi ovih lica uređuju se ugovorom koji se registruje kod nadležnog općinskog organa.

Obrt iz stava 1. ovog člana posluje pod zajedničkom firmom.

**Član 32.**

Fizička lica mogu zajednički obavljati obrt ako udovoljavaju uslovima iz člana 5. ovog Zakona.

Fizička lica mogu zajednički obavljati obrt ako pri upisu u obrtni registar nadležnom općinskom organu prilože ugovor o uređenju međusobnih odnosa.

Fizička lica mogu zajednički obavljati vezane obrte, ako jedno od lica ispunjava uslove iz člana 7. stav 1. ovog Zakona.

Ako je za obavljanje obrta potreban prostor, najmanje jedno lice mora zadovoljiti uslove iz člana 8. stav 1. ovog Zakona.

**Član 33.**

Odredbe ovog Zakona koje se odnose na obavljanje obrta, kada obrt obavlja fizičko lice, odgovarajuće se primjenjuju i na obrt koji zajednički obavlja više fizičkih lica.

**VI. PRESTANAK OBAVLJANJA OBRTA**

**Član 34.**

Obrt prestaje odjavom i po sili zakona.

**Član 35.**

Obrtnik odjavljuje obrt prije prestanka rada.

Odjava obavljanja obrta se upućuje nadležnom općinskom organu u pismenom obliku.

Prestanak obavljanja obrta odjavom utvrđuje se danom navedenim u odjavi.

Ako u odjavi nije naznačen datum prestanka obavljanja obrta prestanak se utvrđuje danom podnošenja zahtjeva za odjavu obrta.

Obrt se ne može odjaviti unatrag.

**Član 36.**

Obrt prestaje po sili zakona:

- smrću odnosno potpunim ili djelimičnim gubitkom poslovne sposobnosti obrtnika, ako se ne nastavi vođenje obrta na osnovu člana 26. i 27. ovog Zakona,
- ako obrtnik izgubi državljanstvo Bosne i Hercegovine ili ako strancu prestane važiti rješenje o obrtu,
- ako ne zaposli najmanje jedno lice u roku od 60 dana od dana početka obavljanja djelatnosti (član 6. stav 1. alineja 2.),
- ako je obrtnik pravosnažnom sudskom odlukom osuđen na kaznu zatvora za krivično djelo povezano sa obavljanjem obrta,

## **"Službene novine Tuzlanskog kantona", broj: 04/04**

- ako obrtnik ne ispunjava uslove iz člana 7. ovog Zakona a ne zaposli lice koje udovoljava tom zahtjevu,
- ako obrtnik ne počne obavljati obrt u roku od 6 mjeseci od dana izdavanja rješenja o obrtu,
- ako obrtnik ne imenuje poslovođu u skladu sa članom 22. ovog Zakona,
- ako je obrtniku izrečena mjera zabrane obavljanja obrta za vrijeme dok ta mjera traje,
- ako obrtnik protivno odredbi člana 29. ovog Zakona obustavi obavljanje obrta bez pismene obavijesti nadležnom općinskom organu,
- ako nadležni općinski organ utvrdi da je obrtniku izdato rješenje za rad na osnovu lažnih dokumenata.

### **Član 37.**

Nadležni općinski organ rješenjem utvrđuje prestanak obrta odjavom ili po sili zakona i dostavlja ga svim subjektima navedenim u članu 15. ovog Zakona.

Po pravosnažnosti rješenja iz prethodnog stava obrt se briše iz obrtnog registra.

## **VII. ORGANIZOVANJE OBRTA**

### **Član 38.**

Radi unapređivanja, usklađivanja i zastupanja zajedničkih interesa 30 obrtnika mogu osnivati udruženja obrtnika na području jedne ili više općina.

Na području iz stava 1. ovog člana može se osnovati samo jedno opće i strukovno udruženje obrtnika.

Udruženje obrtnika je pravno lice.

Udruženje obrtnika se osniva odlukom.

Udruženja obrtnika osnivaju se na teritorijalnom, općem i strukovnom principu.

### **Član 39.**

Udruženje obrtnika ima statut.

Statutum udruženja obrtnika uređuje se naročito: sadržaj rada, organizacija i teritorijalni obuhvat udruženja, način finansiranja, međusobna prava i obaveze članova, organi upravljanja, njihova prava i obaveze, te druge odredbe od značaja za njihov rad u skladu sa ovim Zakonom.

Statut donosi skupština udruženja obrtnika.

### **Član 40.**

Za područje Kantona obrazuje se Obrtnička komora Tuzlanskog kantona (u daljem tekstu: Obrtnička komora Kantona).

Naziv i sjedište Obrtničke komore Kantona određuje se njenim statutom

Obrtnička komora Kantona je pravno lice.

Statut Obrtničke komore Kantona i drugi akti Skupštine Obrtničke komore objavljuje se u službenom glasilu Tuzlanskog kantona.

### **Član 41.**

Članovi Obrtničke komore Kantona su obrtnici i pravna lica koja obavljaju obrt na području Kantona, u skladu sa ovim Zakonom.

### **Član 42.**

Udruženja obrtnika postaju članovi Obrtničke komore Kantona osnivanjem.

Obrtnici postaju članovi Obrtničke komore Kantona danom upisa u obrtni registar.

Evidenciju članova na području Kantona vodi Obrtnička komora Kantona.

Evidencija članova Obrtničke komore Kantona su javne knjige, na osnovu kojih se izdaju odgovarajuća uvjerenja, potvrde i sl., kao javne isprave.

Nadležni općinski organ dostavlja kopiju rješenja o upisu i brisanju iz registra obrta Obrtničkoj komori Kantona, radi upisa u evidenciju članova.

**Član 43.**

Obrtnička komora Kantona može ostvarivati saradnju sa odgovarajućim obrtničkim komorama i udruženjima gradova, pokrajina, regija, kantona u drugim državama, te zaključivati sporazume o međusobnoj saradnji na osnovi međukomorskih obrtničkih pravila.

**Član 44.**

Vlada i ministarstva Tuzlanskog kantona ostvaruju saradnju sa Obrtničkom komorom Kantona kao partnerom u zastupanju interesa članova Obrtničke komore Kantona, posebno u slijedećem:

- pripremi i donošenju zakona, drugih propisa i mjera ekonomske politike i instrumenata kojima se uređuje ekonomski položaj obrtnika,
- pripremi i donošenju mjera razvoja obrtništva i obrazovanju kadrova,
- promociji obrtništva u zemlji i inostanstvu,
- drugim pitanjima od interesa za razvoj obrtništva.

**Član 45.**

Organizacija, zadaci i poslovi Obrtničke komore Kantona utvrđuje se njenim Statutom.

**Član 46.**

Obrtničkom komorom upravljaju članovi putem nadležnih organa.

Organi Obrtničke komore Kantona su Skupština, Upravni odbor, Nadzorni odbor i predsjednik.

Izbori za organe Obrtničke komore Kantona su tajni i vrše se na 4 godine.

Statutom Obrtničke komore Kantona utvrđuje se sastav i način izbora, vodeći računa o strukovnoj, teritorijalnoj i nacionalnoj zastupljenosti.

**Član 47.**

Skupština Obrtničke komore Kantona ima slijedeće nadležnosti:

- donosi statut,
- donosi smjernice za godišnji i dugoročni program razvoja,
- usvaja izvještaj o radu,
- usvaja finansijski plan i završni račun,
- bira i razrješava ostale organe Obrtničke komore Kantona u skladu sa Statutom,
- donosi druge odluke, zaključke i preporuke utvrđene zakonom i Statutom.

**Član 48.**

Obrtnička komora Kantona može vršiti javna ovlaštenja na osnovu odgovarajućih kantonalnih propisa i odobrenja Vlade Kantona.

Akti koje izdaje Obrtnička komora Kantona u vršenju javnih ovlaštenja su javne isprave.

**Član 49.**

U organe Obrtničke komore Kantona biraju se istaknuti obrtnici i naučnoistraživački radnici iz oblasti obrta i poduzetništva.

Broj, sastav, način izbora organa Obrtničke komore Kantona, nadležnost, organizovanje rada i druga pitanja utvrđuju se Statutom i drugim aktima.

**Član 50.**

U okviru Obrtničke komore Kantona djeluju sudovi časti.



## **"Službene novine Tuzlanskog kantona", broj: 04/04**

Sudovi časti vode postupak i odlučuju o povredama poslovnih običaja, ugovora, tržišnih pravila i drugih propisa.

Nadležnost sudova časti određuje se prema sjedištu podnosioca prijave ili sjedišta obrtnika protiv kojega je podnesena prijava.

Statutom i drugim aktima Obrtničke komore Kantona utvrđuje se organizacija, sastav i način izbora, mjere koje može izreći, postupak i druga pitanja rada sudova časti.

### **Član 51.**

Sredstava za rad Obrtničke komore Kantona obezbjeđuju se iz članarine, kotizacije, prihoda od imovine, naknada za usluge i drugih izvora u skladu sa Statutom i drugim aktima Obrtničke komore Kantona.

Osnovicu, stopu, rokove i način plaćanja članarine i kotizacije i drugih prihoda utvrđuje Skupština Obrtničke komore Kantona.

### **Član 52.**

Odluku o izboru prve konstituirajuće sjednice Skupštine Obrtničke komore donijet će Vlada Kantona, na prijedlog udruženja sa područja Kantona, u roku od 4 mjeseca od dana stupanja na snagu ovog Zakona.

### **Član 53.**

Obrtnička komora Kantona je članica Federalne Obrtničke komore.

## **VIII. NADZOR I UPRAVNE MJERE**

### **Član 54.**

Nadzor nad primjenom odredaba ovog Zakona i propisa donesenim na osnovu njega vrši Kantonalna tržišna inspekcija.

Poslove inspekcijskog nadzora u okviru nadležnosti općine vrše nadležne službe za poslove inspekcija.

### **Član 55.**

Ako se obrt obavlja bez rješenja o obrtu ili se vrši mimo odobrene djelatnosti nadležna inspekcija donijet će rješenje o zabrani obavljanja obrta.

U provedbi rješenja iz prethodnog stava inspektor je ovlašten da na odgovarajući način izvrši prinudno zatvaranje radnje - pogona pečačenjem, a može privremeno do odluke suda oduzeti i sredstva rada.

### **Član 56.**

Ako prostor i oprema obrtnika ne udovoljavaju propisanim uslovima, odgovarajuće inspekcije donijet će rješenje kojim će odrediti rok do koga se nedostaci moraju otkloniti.

Ako se nedostaci ne otklone u određenom roku nadležna inspekcija donijet će rješenje o zatvaranju prostora odnosno o zabrani upotrebe uređaja i opreme.

## **IX. KAZNENE ODREDBE**

### **Član 57.**

Novčanom kaznom u iznosu od 1.000 do 5.000 KM kaznit će se za prekršaj obrtnik ako:

- obavlja obrt koji nije obuhvaćen rješenjem o obrtu, odnosno za koji nije dobio rješenje o obrtu (član 12.),
- ne prijavi početak obavljanja obrta (član 14.),
- koristi izdvojene poslovne prostorije (pogone) bez odobrenja (član 23.).

Za prekršaj iz prethodnog stava kaznit će se i odgovorno lice u pravnom licu novčanom kaznom u iznosu od 200 do 1.000 KM.

## **"Službene novine Tuzlanskog kantona", broj: 04/04**

Za prekršaj iz stava 1. ovog člana, uz izrečenu novčanu kaznu obrtniku će se oduzeti i imovinska korist pribavljena prekršajem.

Za ponovljeni prekršaj iz stava 1. ovog člana obrtniku se može izreći mjera zabrane obavljanja djelatnosti.

### **Član 58.**

Novčanom kaznom u iznosu od 600 do 3.000 KM kaznit će se obrtnik ako ne:

- obavlja rad pod firmom određenom u rješenju o obrtu (član 16. stav 2.),
- istakne firmu obrta (član 16. stav 6.),
- prijavi promjenu firme i sjedište obrta (član 18.),
- podnese prijavu o privremenom obustavljanju obrta (član 29. stav 1.),
- podnese prijavu o ponovnom početku obavljanja obrta (član 29. stav 3.),
- istakne cijenu svojih proizvoda i usluga i ne ispuni druge uslove u obavljanju djelatnosti (član 30.).

Za prekršaj iz prethodnog stava kaznit će se i odgovorno lice u pravnom licu novčanom kaznom u iznosu od 200 do 800 KM.

Za prekršaj iz stava 1. alineje 2. i 6. ovog člana, inspektor može kazniti obrtnika na mjestu izvršenja prekršaja novčanom kaznom u iznosu od 100 KM.

## **X. PRIJELAZNE I ZAVRŠNE ODREDBE**

### **Član 59.**

Obrtnici kojima je obavljanje obrta odobreno po ranijim propisima nastavljaju obavljati isti do odjave djelatnosti ili prestanka rada, uz obavezu upisa u registar u roku od godinu dana od dana stupanja na snagu ovog Zakona. U suprotnom prestaje mu važnost odobrenja za obavljanje obrta.

### **Član 60.**

Nadležno ministarstvo Kantona donijet će u roku od godinu dana od dana stupanja na snagu ovog Zakona propise o obrazovanju i osposobljavanju kadrova za obavljanje obrtičke djelatnosti.

### **Član 61.**

Vlada Kantona donijet će podzakonske akte iz člana 11. stav 3. u roku od 60 dana od dana stupanja na snagu ovog Zakona.

Nadležna ministarstva donijet će podzakonske akte iz člana 2. stav 7. i člana 8. stav 5. u roku od 60 dana od dana stupanja na snagu ovog Zakona.

### **Član 62.**

Fizička lica koja su po prijašnjim propisima stekla odgovarajuću stručnu spremu ili osposobljenost mogu obavljati vezane obrte utvrđene ovim Zakonom, ako na dan stupanja na snagu ovog Zakona imaju osnovanu radnju.

### **Član 63.**

Ustrojavanjem Obrtničke komore Kantona prestaje sa radom Opće privredno udruženje samostalnih privrednika i njihovih zadruga i udruženja samostalnih privrednika regije Tuzla organizovana po propisima čija primjena prestaje stupanjem na snagu ovog Zakona.

Općinska udruženja obrtnika preuzimaju prava i obaveze dosadašnjih općinskih udruženja samostalnih privrednika.

### **Član 64.**

Odredbe ovog Zakona uskladit će se sa odredbama Zakona o obrtu Federacije BiH, po njegovom stupanju na snagu.

**Član 65.**

Ovaj Zakon stupa na snagu u roku od 30 dana od dana objavljivanja u službenom glasilu Tuzlanskog kantona.

**B o s n a i H e r c e g o v i n a**  
**Federacija Bosne i Hercegovine**  
**T U Z L A N S K I K A N T O N**  
**S k u p š t i n a**

Broj: 01-011-184-6/99.

Tuzla, 30.4.1999. godine

**Predsjednik**

**Skupštine Tuzlanskog kantona**

**Dr. Izet Žigić**